

Date – 31/12/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Kum hlui 2025 thlah a kum thar 2026 hmuak thleng turin Mizoram a inbuatsaih fel tawh.
2. Chief Minister Pu Lalduhoma'n kum 2026 chuangkai thei tura an awm chu Pathian hnenah lawmthu sawi turin Zoram mipuite a sawm.
3. Tourism Minister Pu Lalnginglova Hmar chuan Mizoram chu thlasik laia khualzin hip na tur Mizorama hmun tlawh tur awmah te an buatsaih zel dawn tih a sawi.
4. Madhya Pradesh Indore Dist-ah tui thianghlim lo in vangin mi 5 an thi a, mi 35 chuang, damdawi inah enkawl mek an ni bawk.



NEW YEAR

Kum hlui 2025 thlah a kum thar 2026 hmuak thleng turin Mizoram a inbuatsaih fel tawh.

Kum hlui thlah leh kum thar lawmna atan vawiin khan cake, sa leh eitur chi hrang hrang lei-in mi tam tak an hmanhlel a. Zing atangin sa zawrhna hmun leh chhang siam dawrte a lun hle. Zanin hi kumina ni hnukung ber a nih avangin kohhran tam ber chuan kumin chhunga Chatuan ram pan tate pualin biak-in Pathian inkhawmna-ah hun an hmang dawn a. He hun hmang tur hian an hmangaih kalta te chu an chungkhat lainate leh thian thate nen inkhawm turin an inbuatsaih a ni. Sorkar leh Central YMA chuan a bik takin zanin zan lai a halpuah leh halmawi hal lo turin mitin an ngen a. Halpuah leh halmawi hal hian boruak a tihchhiat bakah tar chak lo leh damlo chak lo, a bikin lungphu tha lo neite bakah leh thil ri ring hlaute tithlabartu leh harsatna siamsaktu ni lo turin mitin an ngen a ni. Kohhran thenkhat chuan naktukah hian Kumthar lawmna ruai an theh dawn a, a tam ber erawh chuan January ni 2-ah ruai an theh zawk dawn ni a hriat a ni.

Aizawl pawn district dangah pawh kum hlui thlah a, kum thar hmuak turin mi an inpuahchah nasa hle a. Zanina chhungkua leh thiante nena eikhawm turte pawh vawiin khan an lam khawm hlawm a. Zanin hian kumin chhunga an kohhran member chatuan ram pan tate pualin a bik taka hun hman a ni ang a. Naktuk emaw a

tuk leh emaw a ruai theh turin an inbuatsaih hlawm a. Naktukah kohhran hrang hrangin kumthar inkhawm an buatsaih dawn a, lenkhawm pawh a awm dawn a ni.



CM's NEW YEAR MESSAGE

Chief Minister Pu Lalduhoma chuan kum 2026 chuangkai thei tura an awm chu Pathian hnenah lawmthu sawi turin Zoram mipuite a sawm.

He thu hi kum hlui thlahna leh kumthar lawmna atana Zoram mipuite hnena a thuchahah sawiin Pu Lalduhoma chuan kumthar chuangkaite hian an nunhlui a thil thalo te kalsan a, nun thar a bul tan leh theihna hun tha an nei thei tihna a ni tih hre thar turin a chah a. Thinlung thar nena hmalam pan zel turin mipuite a sawm a ni. Sorkar pawhin ram hmasawna leh mipuite rawng a bawlna tinrengah a hma aia tha zawka kal a tum a ni, a ti a. Hmasawna thar tam tak thlentir chu sorkar in a tum dawn a ni, a ti. Kum a lo thar hian thal khaw ro hun a thleng ve nghal mai a, thalah hian kangmei a chhuak thin a. Lui lama kal pawhin vanduaina tam tak an tawh thin avangin mipuite chu fimkhur lehzuat turin a chah a. Chief minister chuan kum 2026 chu Zoram mipuite tan kum tha leh malsawm kum a nih theih na'n duhsakna a hlan bawka a ni.



HM NEW YEAR MESSAGE

Home Minister Pu K. Sapdanga kum 2026 kumthar lawm tur inbuatsaihna kal mekah nikum lamah khan, dan tlawhchhanin, halpuah leh halmawi hal lo turin inngen a nih thu sawiin mi tam zawkin an zawm tha hle a ni tiin lawmthu a sawi a. Halpuah leh Halmawi hal hi a nuamin, a hlimawm hle mai a, han inkhap leh, ti lo tura han inngen te pawh a hrehawm a tih thu a sawi a. Chuti chung chuan damlo leh mi chaklo zawkte hian, halpuah ri leh halmawi khute hi an manganphah em mai a, hei vang chauh pawh hian, insum hram turin mi tinte a ngen leh a ni.

Mizote chu tanpui ngaite tanpui thin, khawngaihthlakte khawngaih thin, thlaphangte thlamuan thin, lusunte pawh tlaivara tawrhpuoi thin hnam nihna-ah kha Zo nun ze mawi kha lan chhuahtir thar leh ila a duh thu a sawi a. Halpuah leh Halmawi hmangin tumah thlabarin siam lo turin a ngen a. Nu leh Pate, Thalaite leh naupangte zah tak chungin, he ngenna hi a siam tih a sawi a. Kum 2026 kumthar atan mi tinte chibai a buk a, duhsakna sang ber a hlan thu a sawi bawka a ni.



NEW YEAR SECURITY

Aizawl khawpui-in muanawm taka kum hlui thlaha kum thar a hmuah theih na'n uluk taka venhimna kalpui-in ruahmanna siam a ni.

Aizawl district SP Pu Zosangliana'n Akashvani Aizawl news a hrilh danin ke a kal leh lirthei hmanga venhimna hna thawk turin Police rual ruahman a ni a. Hei bakah hian rikrum thila inring turin Flying Squad leh Quick response team siam an ni bawka a. Aizawl leh a chhehvel hnai hi Zone li a thenin, Zone tin hi office Dy.SP pahnih zelin an vil ang a, Zone li hi sector 18-ah then a ni bawka. He'ng duty-te supervise leh monitor turin SDPO 2, Addl SP 2 bakah district SP te an duty-na hmunah kal kualin an vil bawka ang. SP chuan Police duty-te hi chhun-zan zawmin an awm reng dawn tih a sawi a. Venhimna lam an ruahman hi January ni 2 thleng

kalpui tura tih phawt a nih thu a sawi. Nikum lama sorkar thupek bawhchhia a halpuah leh halmawi haltute halna hmun hre tura drone an hmang ang kha kuminah hi chuan tih a ni dawn lo a ni, a ti.

Nimin khan Aizawl district Crime Branch Addl. SP Pu Zoramthara hovin Police leh central YMA te chuan Aizawl Dawrpui veng velah halpuah leh halmawi an dap a. Man an nei lo niin a sawi. Nikum lama an dap tawh thin avangin zuar an awm a nih pawhin an thukru tha hle ni a an ngaih thu Police hotute chuan an sawi a ni.

Lunglei-ah pawh nimin khan district SP Pu J. Lalmuankima hovin Krismas hman zawh taka Lunglei Police-te duty dan an thlirlet a. Thukhawmte hian kum hlui thlah zanah mipuite halpuah leh halmawi bakah, puak thei chi reng reng hal lo turin an ngen a. He hunah hian halpuah leh halmawi chungchanga District Magistrate-in khapna thupek a chhuah tawh anga khauh taka hma lak dan tur sawi ho a ni bawk a. Kum thar lo thleng tur hmuahnaah police leh traffic lam chu inthlahdah lova duty ngawrh taka chhunzawm tur leh veng kilkhawr lamte pawh tlawh kual vek tura hriattir an ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



SUNSET

Tourism Minister Pu Lalnghinglova Hmar chuan Mizoram chu thlasik laia zinmi te hmun tlawh turin, Winter Destination-ah chhuah an duh avangin khualzin hip na'n Mizorama hmun tlawh tur awmah te an buatsaih zel dawn tih a sawi.

Vawiina Tourism Department buatsaih Sakawrhmutuai tlang atanga kumin ni tla hnuhnung ber thlirliamna hun 'Sakawrhmutuai Sunset' hmanna-ah Tourism Minister Pu Lalnghinglova Hmar chuan Akashvani Aizawl zawhna chhangin, Mizoram chuan khawvel pum huapa tlang thengthaw nuam pawl, Sakawrhmutuai tlang a nei tih sawiin, he tlang hi ni chhuak leh ni tla tur thlir na'n a mawi em avangin khawvelin an hriat theih tura phochhuah an duh a, mipuite'n he tlang hi tlawhchhan an neih theih na'n Sihphir khawtlang nen tangrualin Tourism Department chuan Sakawrhmutuai Sunset hi an buatsaih a ti a. Kuminah a vawikhatna atana an buatsaihah hian mipui kal an thahnem hle a a hriat thu leh Mizoram pawn atanga tlawhtu pawh an awm nual tih a sawi a. A kum telin Sakawrhmutuai tlang tlawhtu chu an pun chhoh zel a beisei thu a sawi bawk a ni. Tourism Minister chuan Mizoram chu thlasik laia zinmi te hmun tlawh turin, Winter Destination-ah chhuah an duh avangin Winter Festival, Christmas Parade, Sakawrhmutuai Sunset leh Tlaizawng Paradise te chu khualzin hip nan an ti chho zel dawn tih a sawi a ni.

Byte: Tourism Minister

Sakawrhmutuai Sunset hi vawiin chawhnu dar 2 atanga tan niin, stall chi hrang hrang hawn a ni a, zaithiam lar tak takte'n Mizoram chhung leh pawn hmun hrang hrang atanga mipui kalkhawmte chu zaiin an awi a ni.

<><><>

MP CONTAMINATED WATER

Madhya Pradesh Indore Dist-a Bhagirathpura-ah tui thianghlim lo in vangin mi 5 an thi a, luak leh kawthalo vangin mi 35 chuang, damdawi inah enkawl mek an ni bawk.

State Chief Minister Dr Mohan Yadav-a chuan thihna thleng chu pawl a tih thu sawiin thi chhungte hnenah zangnadawmna, cheng nuai 2 theuh pek an ni ang, a ti a, damloten enkawlna tha ber an dawng tur a ni, a ti bawk.

Chief Minister thupek angin, he thil thleng avang hian Dy Engineer pakhat ban nghal a ni a, Zonal Officer leh Assistant Engineer-te suspend nghal an ni bawk.

<><><>

DENMARK ENDS POSTAL MAIL

Denmark chuan kum 400 chhung an kalpui tawh, dak-a lehkha thawn theihna chu tunkar atang khan a ti tawp a, kum 2000 atanga dak-a lehkha inthawn zat, zaa 90 chuanga a tlak hniam hnuah sorkar postal service, PostNord chuan lekhathawn dawnte, a tawp nan a sem chhuak a ni.

Denmark hi dak service titawp hmasa ber ram a ni a, lekhathawn thlakna Mailbox 1500-te chu tanpui ngaite tanpui lila a ni a, tunah chuan Denmark mipuiten an lekhathawn thlakna tur mailbox an nei tawh dawnlo a ni.

<><><>

KHALEDA ZIA LAID TO REST

Damlohna avanga nimina thi, Bangladesh hmeichhe Prime Minister hmasa ber, Bangladesh Nationalist Party Chairperson Begum Khaleda Zia chu vawiin khan sorkar chawimawina famkim nen ropui taka vui liam a ni a, vuina inkhawmah hian Bangladesh sorkar hotute leh sipai chi 3 hotute lute, BNP hruaitute leh political party hrang hrang hruaitute bakah ram dang hruaitute pawimawhte an tel a, India ram aiawhin External Affairs Minister, Dr. S. Jaishankhar-a tel a ni.

Bangladesh Prime Minister tum hnih ni tawh, Begum Khaleda Zia-i hi a pasal, President hlui Ziaur Rahman-a thlan bulah phum a ni.

<><><>